

ԳԻՏՈՒԹՅԱՆ ՊԱՏՄՈՒԹՅՈՒՆ


Լ. Ա. ԱՎԱԿՅԱՆ

ՊԵՏՐՈՍ ՂԱՄԲԱՐՅԱՆ

(«Անվանի հայ երկրաբաններ» շարքից)

Հայաստանի երկրաբանական ծառայության հնագույն աշխատող, անվանի երկրաբան Պետրոս Ղամբարյանը ծնվել է 1899 թվականին՝ Թիֆլիսում, ծառայողի ընտանիքում: Նրա հայրը իրավունքի մագիստրոս էր, իսկ մայրը՝ դաշնակահար:

Նախնական կրթությունը Պետրոսը հիմնականում ստանում է տանը իր առաջին ուսուցիչների՝ ծնողների ղեկավարությամբ, իսկ քննությունները հանձնում է էքստերն կարգով, միշտ ստանալով բարձր գնահատականներ:



Պետրոսը մանուկ հասակից հանդես է բերում բացառիկ սեր դեպի նկարչությունը: Արտակարգ ընդունակ և մեծ շնորհքի տեր պատանին նկարում է բազմաթիվ կտավներ, որոնցից շատերը ցուցադրվում են Թիֆլիսում կազմակերպված նկարիչների ցուցահանդեսներում¹:

¹ Այդ կտավների մի որոշ մասը ներկայումս գտնվում է նրա որդու, ՍՍՌԻ Միության Գիտությունների ակադեմիայի Կենդանաբանության ինստիտուտի (Հենինգրադ) սուլադ ղիտական աշխատող Պ. Պ. Ղամբարյանի մոտ:

Յուդանկարչությունից բացի Պետրոսը ղբաղվում է նաև փորագրությամբ: Փայտի վրա նրա փորագրած լավագույն գործերից մեկը ձեռք է բերում Մոսկվայի նախկին Ռումյանցևի թանգարանը, իսկ այդ աշխատանքի լուսանկարը տպագրվում է անգլիական «The Studio» ամսագրում:

Ղամբարյանը մեծ հետաքրքրություն է հանդես բերում նաև դեպի որմնանկարչությունը: Այդ ընագավառում կատարած նրկարատե աշխատանքի ու որոնումների արդյունքները դրսևորվում են նրա «Զիբուխի դյուղը Սևանա լճի ափին» խոշոր որմնանկարում, որը նա նկարել է Թիֆլիսի Չերժինսկու փողոցի (Սոլոյակ) շենքերից մեկի պատի վրա (տարիների ընթացքում շենքի վերանորոգումների հետևանքով որմնանկարը ներկայումս չի պահպանվել):

1920 թվականին Պետրոս Ղամբարյանը մեկնում է արտասահման բարձրագույն կրթություն ստանալու Սակայն, նյութական կարիքը հարկադրում է նրան ժամանակավորապես հրաժարվել իր մտադրությունից և օրվա հաց հարելու համար մտնել աշխատանքի: 1920—1922 թվականների ընթացքում Պ. Ղամբարյանը ապրում է Խտալիայում և աշխատում է երկրի մի քանի հանքավայրերում որպես բանվոր:

1922 թվականին Պ. Ղամբարյանը գալիս է Փարիզ, այստեղ նա թողնում է նկարչությունը և տարվում է երկրաբանությամբ: Նույն թվականին նա ընդունվում է Սորբոնի համալսարանը, ուր մի քանի տարի շարունակ մեծ սիրով ու նվիրվածությամբ լսում է երկրաբանական ցիկլի առարկաների լրիվ դասընթացը և միաժամանակ աշխատում է Բնա-պատմական թանգարանում ականավոր պրոֆեսորներ Մոգենի և Լաբրուաի ձեռքի տակ: Երկրաբանական տեսական ու գործնական գիտելիքների տիրապետման գործում Պետրոսին մեծ օգնություն է ցույց տալիս նաև նշանավոր պրոֆ. Պիեր Բոնեն, որը նախկինում աշխատել էր Հայաստանում և բավական ծանոթ էր Հայաստանի երկրաբանական կառուցվածքի հետ:

1927 թվականին Պ. Ղամբարյանը աւլարտում է համալսարանը և շարունակում է իր աշխատանքը Բնա-պատմական թանգարանում: Նույն թվականին նա ընտրվում է Ֆրանսիական հանքաբանական ընկերության իսկական անդամ: Պրոֆ. Մոգենը բարձր գնահատելով Ղամբարյանի գիտա-մանկավարժական աշխատանքի համար ունեցած արտակարգ ընդունակությունները, առաջարկում է նրան որպես ասիստենտ աշխատել իր մոտ: Սակայն երիտասարդ ու շատ համեստ երկրաբանին չեն դրավում ոչ Փարիզի շքեղությունն ու զեղեցկությունը և ոչ էլ այնտեղ սպասվող ասպագա փառքը: Պետրոսին հզոր մագնիսի ուժով ձգում են իր հեռավոր հայրենիքը և այնքան հարազատ ժողովուրդը, նրան առաջնորդում են իր հայրենիքի և ժողովրդի բարօրության համար ազնվաբար ու նվիրված ծառայելու պարտքի հատուցման վեհ դադափարները:

1927 թվականին Պետրոս Ղամբարյանը թողնում է Փարիզը, գալիս է Սովետական Հայաստան ու աշխատանքի է հրավիրվում Երևանի Պետական համալսարանում: Այստեղ նա աշխատում է սկզբում որպես բիմիական (որականական անալիզի) լաբորատորիայի վարիչ, իսկ այնուհետև՝ երկրաբանական առարկաների (բյուրեղագիտություն, հանքաբանություն և քարագիտություն) դասախոս: Շուտով նա ստանում է դոցենտի կոչում, իսկ 1930 թվականին, երբ Երևանի Պետական համալսարանի բաղալի վրա ստեղծվում է Պոլիտեխնիկա-

կան ինստիտուտը, Պ. Ղամբարյանը դոցենտի պաշտոնով փոխադրվում է այդ նորաստեղծ բարձրագույն ուսումնական հաստատությունը:

Ինչպես համալսարանում, այնպես էլ Պոլիտեխնիկական ինստիտուտում Պ. Ղամբարյանը հատուկ ուշադրություն է դարձնում երկրաբանական առարկաների դասավանդման վրա և ականավոր երկրաբան պրոֆ. Տիգրան Զրբաշյանի հետ միասին, մեծ աշխատանք է տանում Քիմիական ֆակուլտետում երկրաբանական թեքումով ազդային մասնագիտական կադրեր պատրաստելու ուղղությամբ¹: Ուշագրավ է, որ այդ կադրերի առաջնեկը հանդիսացել է Հայկական ՍՍՌ Գիտությունների ակադեմիայի երկրաբանական գիտությունների ինստիտուտի պետրոգրաֆիայի բաժնի վարիչ Գևորգ Բաղդասարյանը, որը 1929 թվականից մինչև Պետրոս Ղամբարյանի ուլբերգական մահը աշխատել է նրա մոտ և իր առաջին երկրաբանական մկրտությունը ստացել է իր տաղանդավոր ուսուցչի արշավախմբերում:

Մանկավարժական աշխատանքին զուգընթաց Պ. Ղամբարյանը 1928 թվականից սկսած մինչև իր կյանքի վերջը տանում է նաև գիտա-հետազոտական աշխատանք, պաշտոնավարելով ռեսպուբլիկայի երկրաբանական ծառայության սկզբնական օջախ հանդիսացող երկրաբանական-հետազոտական վարչությունում:

1928—1933 թվականների ընթացքում նա հետազոտում է Մերձերևանյան (լայն առումով) և Հրազդանի շրջանները, ուսումնասիրելով այդ շրջանների երկրաբանական կառուցվածքը և օգտակար հանածոները (դիատոմիտ, մարմար, սրաքար, տրաս, կավ և այլն): Պետրոս Ղամբարյանի կատարած երկրաբանական-հետախուզական աշխատանքների արդյունքները ամփոփված են հրատարակված երկու աշխատություններում և երեք տասնյակից անցնող գիտա-տեխնիկական ձեռագիր հաշվետվություններում, որոնք պահվում են Հայկական ՍՍՌ Մինիստրների Սովետին առընթեր երկրաբանության և ընդերքի պահպանման վարչության ֆոնդերում:

Մի փոքր ավելի մանրամասն կանգ առնենք նրա կատարած գիտա-հետազոտական աշխատանքների վրա:

1928 թվականին Պ. Ղամբարյանը հետազոտում է Արովյանի շրջանի Զորադրյուր գյուղի շրջակայքի տրասները, որպես հիդրավիկ ավելցուկ օգտագործման համար: Ահա այդ ժամանակ էլ, դաշտային աշխատանքի հենց առաջին տարում Պ. Ղամբարյանը իրեն դրսևորում է որպես տաղանդավոր և փորձված հետազոտողի, որը անցել է տեսական ու գործնական աշխատանքի ինքնուրույն, հիանալի դպրոց և հեշտությամբ կողմնորոշվում է ամենաբարդ երկրաբանական պայմաններում: Այդ է հաստատում նաև 1929 թ. նրա ներկայացրած «Թեջրաբակի տրասները» հաշվետվությունը, որը ինչպես իր բովանդակությամբ, այնպես էլ ձևավորմամբ ներկայացնում է միանգամայն կատարյալ գիտա-տեխնիկական ավարտված, լավագույն գործ:

1929 թվականին Պետրոս Ղամբարյանը մասնակցում է Սովետական Միության Գիտությունների ակադեմիայի Անդրկովկասյան արշավախմբի աշխատանքներին իբրև Երևանի խմբի պետ: Նա հետազոտում է Հրազդան գետի

¹ Երևանի Պետական համալսարանի երկրաբանական ֆակուլտետը բացվել է ավելի ուշ, 1934 թվականին, պրոֆ. Տ. Զրբաշյանի և համալսարանի ռեկտոր Տ. Մուշեղյանի նախաձեռնությամբ:

ստորին հոսանքի երկրաբանական կառուցվածքը և կազմում է այդ տեղամասի երկրաբանական քարտեզը: Այդ ուսումնասիրությունների արդյունքներն ամփոփված են նրա բավական ստվար աշխատությունում¹, որն ունի լեռնագրություն, երկրաբանություն, քարագիտություն, օգտակար հանածոներ գլուխները, երկրաբանա-պետրոգրաֆիական քարտեզ և բազմաթիվ լուսանկարներ ու ապարների քիմիական կազմի աղյուսակներ: Աշխատության հատկապես արժեքավոր մասը հանդիսանում է հրաբխային ապարների նկարագրությունը, նրանց փոխհարաբերության ու հասակի հարցերի որոշումը, ինչպես նաև Շոռաղբյուրի նստվածքային շերտախմբի և պարունակող ֆաունայի բնութագրումը:

1930 թվականին Պ. Ղամբարյանը ուսումնասիրում և հետազոտում է Աբովյանի շրջանի նուռնուսի դիատոմիտի հանքավայրը, որը շուտով հանձնրվում է շահագործման: Այդ հանքավայրին է նվիրված նրա երկրորդ տպագիր աշխատությունը², որը մանրամասն կերպով տալիս է նուռնուսի տեղամասի երկրաբանական կառուցվածքը, որոնողա-հետախուզական աշխատանքների նկարագիրը և դիատոմիտի ֆիզիկա-քիմիական հատկությունների ու կիրառման բնութագիրը: Աշխատության մեջ բերված են նաև հանքավայրի երկրաբանական քարտեզը, կտրվածքներ և մի շարք լուսանկարներ:

Այդ նույն թվականին Պ. Ղամբարյանը աշխատում է մարմարների գծով, հետազոտում է Հրազդանի շրջանի Արզականի և Աղվերանի հանքավայրերը, տալիս է նրանց պետրոգրաֆիական նկարագրությունը, մարմարների տեղադրման պայմանների ու հատկությունների բնութագիրը և հետադա որոնողա-հետախուզական աշխատանքների ուղությունը³:

1931 թվականին Ղամբարյանը որոնողա-հետախուզական աշխատանքներ է կատարում Փարաքար, Զորաղբյուր և Փարբի գյուղերի շրջակայքում կավի («գիլ») և դիատոմիտի նոր հանքավայրեր հայտնաբերելու ուղղությամբ:

1932 թվականին նա երկրաբանական աշխատանքներ է տանում Արտաշատի և Վեդու շրջաններում և Զաջուռի ածխի հանքավայրում:

Պետրոս Ղամբարյանը գիտա-հետազոտական աշխատանքներ է կատարել նաև ինժեներական երկրաբանության բնագավառում: Նա Քանաքեռգէսի շինարարության կապակցությամբ ուսումնասիրել է գրունտների հատկությունները, տվել է մի քանի եզրակացություններ հիդրո-տեխնիկական և այլ խոշոր կառույցների երկրաբանական պայմանների մասին:

Ղամբարյանի գրչին են պատկանում ևս մի շարք ձեռագիր աշխատություններ և հաշվետվություններ, որոնք նվիրված են Երևանի բազալտների էլեկտրաձուլման և վերաբյուրեղացման, ռեսպուբլիկայի հնարավոր նավթաբերության հարցերին:

¹ «Геолого-петрографический очерк района средней Занги». Бассейн реки Занги, часть II. Геолого-гидрогеологические очерки. Труды Совета по изучению природных ресурсов (СОПС). Серия Закавказская, вып. 10. Издательство АН СССР, Ленинград, 1934.

² «Нурнусское месторождение диатомита», Сборник научно-исследовательских трудов НИС-а Уполн. НКТП при СНК ССР Армении, № 1. Отв. редактор гор. инж. А. С. Зорабян. Ереван, 1934.

³ Տե՛ս «Арзаканское месторождение мрамора» հաշվետվություն:

Ինչպես երևում է Պ. Ղամբարյանի կատարած գիտա-հետազոտական աշխատանքների համառոտակի շարադրումից, նա ընդգրկել է երկրաբանական գիտությունների լայն շրջանակներ, հավասարաչափ կերպով զբաղվել է և հանույթով, և օգտակար հանածոների որոնողա-հետախուզական աշխատանքներով: Ղամբարյանն ուներ տեսական ու դործնական գիտելիքների մեծ պատրաստականություն և դաշտային հետազոտման աշխատանքների ինքնատիպ մեթոդներ. նա ազատ կերպով տիրապետում էր եվրոպական մի քանի լեզուների (ֆրանսերեն, իտալերեն, գերմաներեն ու անգլերեն) և քաջ գիտակ էր համաշխարհային մասնագիտական գրականությանը:

Պետրոս Ղամբարյանը ղոհվեց 1934 թվականի փետրվարի 8-ին, ինքնաթիռի աղետի ժամանակ, երբ նա Բաքվից վերադառնում է Թիֆլիս, ուր մեկնել էր պրոֆ. Վ. Վ. Բոգաչևի մոտ կոնսուլտացիաներ ստանալու և մի քանի տարիների ընթացքում հավաքած հնէաբանական նյութեր մշակելու համար:

Պ. Ղամբարյանի անակնկալ մահը մեծ վիշտ պատճառեց ոչ միայն ռեսպուբլիկայի լեռնա-հանքային արդյունաբերության աշխատողներին, այլև ինտելիգենցիայի լայն շրջանների մարդկանց: Լեռնային ինժեներ Ա. Զորարյանի խմբագրությամբ լույս տեսած «Գիտա-հետազոտական աշխատությունների ժողովածուի» անդրանիկ համարում¹ Պետրոս Ղամբարյանի մահվան առթիվ տպագրվում են դամբանական և նրա «Նուռնուսի դիատոմիտի հանքավայրը» աշխատությունը:

Շատ քիչ ապրեց, ընդամենը երեսունհինգ տարի, հազիվ կես կյանք և շատ-շատ քիչ, ընդամենը հինգ-վեց տարի, երկրաբանական ակնթարթ ստեղծագործեց Պ. Ղամբարյանը, սակայն մարդու կյանքի արժեքը չափվում է ոչ թե ապրած տարիների քանակով, այլ տվածով և այդ տեսակետից էլ նա շատ տվեց և քիչ ստացավ:

Ղամբարյանը այն հազվագեյտ, բնածին և մեծ տաղանդի տեր մարդկանցից էր, որն իր գործունեության հենց առաջին տարիներին ճանաչվեց և սիրվեց բոլորի կողմից իբրև իր գործին մինչև վերջ նվիրված, բյուրեղյա, մաքուր, ազնիվ, արտակարգ պարզ ու հասարակ մարդ, մեծ քաղաքացի և հայրենասեր:

Պետրոս Ղամբարյանը մեռավ իր ստեղծագործական ուժերի բուռն ծաղկման շրջանում, երբ Հայաստանում նոր էր ծավալվում երկրաբանական հանույթի և օգտակար հանածոների որոնողա-հետախուզական աշխատանքները և նա ամենայն իրավամբ իր ժամանակակիցների հետ (Հովհ. Կարապետյան, Տ. Զրբաշյան, Ա. Զորարյան և ուրիշներ) հանդիսացավ երկրաբանության հետազոտ առատ բերքի առաջին սերմնացանը:

¹ Տե՛ս «Сборник научно-исследовательских трудов», № 1.